

昭

代

典

則

歷代典則卷之二十

賜進士太子少保刑部尚書晉江黃光昇編輯

吳郡陸翀之訂正

金陵周曰校刊行

憲宗純皇帝

戊戌十四年春正月考察天下朝覲官福建右布政鍾清  
浙江按察使劉鈺江西按察使趙敵以不謹閒住  
鍾清劉鈺趙敵時以清慎正直爲中外所聞權奸忌陷  
俱列不謹君子惜之故特書云

二月皇太子出閣講學

皇太子出閣詔簡儒臣爲東宮官時有東宮內官單吉

識大體。通書史輔導東宮。大學中庸論語諸書皆口授動作舉止。悉導以正。暇則開說五府六部及天下民情農桑軍務。以至宦者專權蠹國諸弊。悉直言之。曰。吾老矣。安望富貴。但得天下有賢主足矣。上嘗賜東宮皇莊五。覃吉備言其不當受。曰。天下山川皆主所有。何以莊爲。徒勞民傷財。爲左右之利而已。竟辭之。東宮出講。必使左右迎請。講官講畢。則語講官云。先生吃茶。局承張端不以爲然。覃吉曰。導師重傳禮當如此。

賜進士曾彥等三百五十人及第出身有差。○進萬安吏部尚書謹身殿大學士劉珏。劉吉並太子少保文淵閣大學士。○上抗盜發詔起終養。食都御史高明討平之。尋辭

疾歸○四川按察副使彭韶陞廣東左布政使○致仕南  
京翰林修撰羅倫卒○夏四月建州夷叛寇遼東○五月  
免徵遼東藥材二年

遼東都司歲貢人參三百斤。五味子一百五十斤。連年  
貢未至。巡撫都御史陳鉞奏藥草產于鳳凰山。潑陽等  
處。距遼東四五百里。密邇虜巢。時被侵掠。不得採取。乞  
暫停免俟事寧之日。採辦如例從之。

以尚寶司少卿戴縉爲右僉都御史協管院事○汪直奏  
請武舉設科。鄉會殿試如進士例。下兵部議

兵部尚書余子俊議上武舉科條。時太監汪直用事。欲  
以建曰爲名。吳綬爲撰草。奏請武舉設科。鄉會殿試悉

如進士恩例下兵部集議於是子俊會文武大臣暨科道官議上武舉科條大畧鄉試以九月會試以三月初場試箭二場試論判語三場試策殿試以四月一日賜武舉及第出身有差恩榮次第錄名勒碑亦如進士科制內閣竊計汪直所奏出吳綬所撰祖宗設科取士文武自是不同然沮之必有禍及奏上票旨武舉重事未易卽行命兵部移文天下教養數年俟有成效巡按提舉等官具奏處置

六月設廣東肇慶府恩平縣○貴州總兵吳經請征普定等處蠻賊不許

貴州普定等處蠻賊劫掠總兵官都督吳經等欲大發

湖廣雲南兵擊之。兵書余子俊以經乃吳綬之兄。畏勢欲往。其奏上曰。兵凶戰危。豈可輕動。蠻夷有患。在防禦有術。若大發兵。恐首惡未得。徒傷無辜。况貴州山菁茂密。縱使兵至。豈能得志乎。其勅巡撫都御史陳儼相度事情。緩急應否。調兵征勦。奏來處置。

秋七月。兵部右侍郎馬文升撫建州夷。尋還京。

先是海西兀者前衛都指揮散赤哈。上番書言開原驗放夷人管指揮。受其珍珠豹皮。兵部移文遼東守臣勘之。管指揮者懼。乃因本衛都督產察繫散赤哈。散赤哈聞之。深怨產察。聲言聚衆犯邊。邊將報守臣。乃譯番書招散赤哈。來廣寧面折。散赤哈遂率所部十數餘人欲

由撫順關進赴廣寧。時叅將周俊等守開原。恐散赤哈至則真情畢露。乃遣使馳報廣寧守臣。詭云海西人素不由撫順關進。恐熟知此道。啓他日患。守臣不虞其詐也。卽召其使速阻之。時散赤哈已入關。聞之大怒。折箭誓恨。復歸至撫順所。備禦都指揮羅雄知事不協。給酒食慰遣。出關時建州三衛女直亦有執誅董山之怒。而全藉海西之勢。緣此遂留散赤哈於建。共來犯邊。勢漸猖熾。守臣以聞。乃招土兵大征建州。而出榜示衆。徒張虛勢。實皆顧戀私家。不趨遼陽。三衛遂得糾合海西人數千。於十四年正月乘虛入境。大掠鳳集諸堡。報至廣寧。巡撫陳鉞懼。始赴遼陽。而寇出已久矣。獨近邊土著

虜人也。僧格等十八人家皆有使入貢。未還恐誤羅兵禍。及拘留其使。乃走撫順所報訴云。犯邊者皆海西人。陳鉞與分守遼陽副總兵韓斌意在撲勦夷人以掩罪。遂皆收繫瀋陽衛。乃乘夜率諸軍襲各寨屠之。訖無所掠。人畜而精壯者間亦脫去。暨回遂捶死也。僧格于獄乃以搗巢之捷聞。時太監汪直者勢焰方熾。惑於通事王英謂往撫可邀大功。上命司禮監出駕帖。太監懷恩以直年少喜功。於本年三月初四日同太監覃昌等七人至內閣傳宣兵部尚書余子俊侍郎張鵬馬文升。比至僉言彼既有使入貢。却又屠其家。今若之何。可以彌息。或言宜以大官酬之。文升曰。官不足以釋其忿。且宋



以李繼遷爲京官。遂至西夏之患。懷恩曰。然則遣大臣同大通事往撫之。衆皆曰。諾。及宣至大內。懷恩傳旨。建州夷人被大軍征勦。恐懷疑懼。着兵部侍郎馬文升。大通事詹升。前去撫安。已而王英卽行。汪直深以爲恨。文升疾馳。追及入貢夷使重陽等。於中途。四月初五日。抵撫順所。先縱重陽左右一二。歸諭其衆。使知朝廷意。乃遂有十數人來見。卽諭以前意。遣歸。尋召各衛酋長。聽宣諭書。由是羣衆皆至。而被屠之家數百人。悉訴其方遣使人貢。無犯邊狀。而冒受殺戮。又果無劫掠人畜可証。今雖仰荷朝廷招安。實難於度日。文升承詔。各以牛布給慰之。且令其酋長赴京。適微聞海西雖來。聽撫猶

思寇掠始歸。乃於東寧衛訪嘗爲建州經歷識字熟女直趙安。以招降爲名。陰探於渠魁十刺。各所果有海西兵馬與否。不數日。趙安歸云。有且賊數千。而馬悉臆壯。時分守開原太監常朗亦遣人來言。海西賊俱動。若來遲恐勢不可撫。文升遂以建州事聞于朝。且言夷雖暫聽撫。觀其言貌詞氣。尚懷反側。難保遽安。仍移文總兵官歐信副總兵韓斌參將崔勝各率所部。及調開原參將周俊帶領開原鐵嶺精兵三千。各分伏鳳集堡一帶。賊以爲無備矣。文升至開原。甫三日。果數路入寇。諸軍以逸待勞。遂斬首二百餘級。生獲數十人。及賊馬器仗無算。而所斬者。率多海西人馬。參將崔勝周俊馳報陳

鉞以爲功。文升因并前所論反側情狀。及今虜人背逆。天道旣聽招安。旋復入寇。以自取滅亡之禍。請移遼東兵勅之。或旣奪其心。而姑與更新招撫。遣通事指揮李璟聞諸上。事下兵部。以爲虜人旣撫安垂成。只仍招撫以安地方。朝廷從之。海西人聞之。且感且懼。都督產察等盡歸降。乃一體諭之。遣其酋入京。而遼東守臣奏報十數日方至。以故賞皆不行。陳鉞由是隙益甚。夷旣降。文升慮其猶踵舍人之怨。則檢其先授官。子孫失襲者。皆令來見。譯審實。請兵部查驗授官。璽書底籍明白。再遣遼東守臣勘實。令襲官者復十數人。夷愈感激。汪直謂夷旣招安。曷又入寇。復主王英言。請帶領頭目百餘。

人給令牌令旗以往夷聞其聲勢久無一人復出者汪直至開原更有文升原所招出兀者前等衛野人女直堵里吉等三百餘人而文升時在撫順汪直不與之接皆怒欲歸寨參將周俊恐敗事乃謂汪直曰不可不請馬欵差來議汪直乃遣人至撫順所邀文升亦馳至開原與汪直會直曰若之何文升曰太監既至此夷卽太監招出者也何間彼此直揣知事不易遂與文升言俱犒之旣又以勝黃通書付各寨招安同以事聞已而直意猶欲再招出見以示已功文升曰太監此來旣有令牌令旗彼懼決無敢出者太監回京可保無虞也汪直乃與文升俱歸遼陽復會聞于上

江西人楊福以僞爲汪直伏罪

江西人楊福嘗爲崇府內使僕役隨入京旣而迴還過南京遇所識者謂其貌似汪直福乃詐稱爲直而所識者僞爲校尉先自蕪湖乘傳給廩歷常蘇由杭州抵紹興寧波諸府有司及市舶司等官皆信畏承奉軍民多以詞訟往訴亦爲受理至台溫處州繞建寧延平皆操兵盤糧以張威福所過假廉以取信而跟隨僞校尉則任其納賄及抵福州稱有勅旨三司而下迎候惟謹小官忤意者輒杖之竟爲鎮守太監盧勝等察知執問如律時直勢振天下故小人乘之擾害如此云

八月召王恕爲南京都察院右都御史叅贊機務○戊戌

早朝東班官聞甲兵聲

東班官若聞有甲兵聲。因辟易。不復成列。衛士爭露刃。以備不虞。久之始定。莫知其故。上命御史究其事。所從起。竟莫能得也。

陞錦衣衛問刑副千戶吳綬爲指揮僉事。仍掌鎮撫司事。  
○九月追降韓府漢陰王徵。鋹爲庶人。

王母平氏妃周氏及冒封郡王縣主者。皆賜死。妃父周恂凌遲。及其妻妾子皆斬之。籍其家。先是王有疾。恂入問竊語。王曰。王疾病無後。何不取家人子以奉王。後王以爲然。令二宮人假若有娠者。諸王來問疾。俱以托之。王薨。恂與王母及妃謀取其妻之女及他人男前後抱。

納宮中。既長俱受封。既而恂之姻家以私忿發其事。下撫按諸司官。廉得其實。刑部尚書林聰等具獄覆奏。上曰。周恂陰謀主使。紊亂宗支。凌遲處死。妻妾子俱斬。冒封男女及平氏周氏俱賜自盡。徵鋌追降爲庶人。仍錄獄詞。寫書各王府知之。

冬十月。加內閣萬安爲太子太保。○逮江西吉安知府黃景隆。至京下詔獄。

巡按江西御史沃類奏。吉安知府黃景隆淹禁凌虐。故勘致死人犯。自成化十一年。至十三年。計三百八十七人。都察院覆奏。命刑部郎中屠勲。錦衣衛百戶楊綱會撫按三司官。鞠治。閱籍致死者。總四百十七人。其無罪。

而故勘故禁歿者實百有六人有一家五人者有父子兄弟三四人者。景隆坐凌遲罪械繫至京下法司議之。景隆尋歿于獄。初知府許聰之歿。景隆任同知有力焉。至是景隆下獄歿。或謂有陰報云。

已亥十五年春正月起致仕。戶部尚書薛達爲南京兵部尚書叅贊機務。

吏科都給事中趙傑等。御史王濬等。交章糾劾薛達潛住京師。貪緣復用。且南京根本重地。叅贊軍國重務。遠昔總京儲。尚孤委任。今贊機務。豈能濟事。况又以奔競而起。臣等竊恐天下效尤而來者。必接踵矣。乞仍罷達致仕。弗從。



三月陞吳道宏爲僉都御史仍撫治鄖襄諸郡○夏四月致仕提督兩廣軍務都察院右都御史韓雍卒○五月直隸常州府地震有聲生白毛○六月汪直同刑部尚書林聰卽訊遼東虜情逮兵部侍郎馬文升下錦衣獄謫戍重慶

文升撫夷遼東巡撫陳鉞行事乖方多被文升更置約束不得動積恨文升會汪直亦至遼東鉞戎裝遠近除道飾厨供帳鮮備賄託僇從兒直叩頭狐趨狗媚無所不至文升獨與汪直抗禮奴視其左右左右多譽鉞詆文升鉞乘間譏毀文升於直文升旣與直還京直復誣奏文升妄啟邊釁謂女直建州諸虜皆由文升禁不與

易農器。故屢寇塞上。仍遣汪直及刑部尚書林聰卽詔遼東。直致恭敬。深自結納於聰。聰上報盡如直言。遂下文升於錦衣獄。文升上言寔禁鐵器。非農器也。竟謫戍重慶。

官  
巡撫江南副都御史牟俸侍講學士汪朝宗下獄。謫戍調

初俸以僉都巡撫山東。適今鎮守遼東副都御史陳鉞爲左布政。二人皆強幹苛刻。不相能。至是太監汪直巡邊於遼。鉞以諂諛見喜。乘間言俸過惡。汪直還遣校尉緝俸貪暴事跡。坐賊萬計。俸適以議事到京。遂迎俸姻家侍講學士汪朝宗俱下獄。拷訊追贓。備受慘酷。行賕

指揮吳綬。諷令被逮。所屬守令代輸僅半。俸竟充鎮遠衛軍。而朝調廣東提舉。俸至戍所。逾年卒。俸爲江西按察使時。知府許聰之久。實有力焉。已不爲公論所與。至是獄竟。人皆知其爲汪直所陷。而無恤其冤者。○內官文升撫循無方。用致邊患。科道官互相容隱。緘默不言。可自陳狀。於是給事中李俊等二十七人。御史王濬等二十九人。合詞請罪。詔廷杖人各二十。時文升謫不以罪。俸賊証未明。俊等莫有論列。及承詰責。而又不肯辯明。冀以吳辭獲免。竟被杖云。

陞戴縉爲右都御史。屠瀟爲右僉都御史。王濬爲南京都

察院右金都御史

先是王越薦御史王濬屠瀟俱才識明達乞峻擢之詔吏部擬缺以聞內批陞二人因及於縉

加工部尚書萬祺太子少保

時特加工部尚書萬祺太子少保先是皇太子出閣六卿皆加保傅祺時理易州山廠不與竟資緣得之祺起吏胥所理者柴炭之事而居保傅之位大臣不敢執正而言官亦無敢進諫者

貴州總兵官吳經以平蠻報捷賜勅獎勵

貴州總兵官吳經等以平西堡蠻賊報捷上命馳勅獎勵之陞報捷人各一級是役也蠻夷零賊劫赴任雲南

參政姚杲家屬吳經奏欲大舉興兵滅之上命都御史陳儼相度事勢爲進止而儼畏經弟綬之勢竟遷延于家以致經大肆殺戮地方疲敝冒濫功賞人莫敢非議云

逮浙江湖州知府李雄下詔獄

浙江湖州知府李雄苛刻取民賦稅狼籍巡按御史張銑牒按察司副使王齊按實劾奏未下會吏部調雄貴州石阡府雄將行齊素與雄有隙乃給銑畱雄使不得行且檢其裝得金銀器皿封識之誣雄夜半斬關而出爲千戶所執銑不察復奏其事命官校崔智械雄至京下錦衣獄雄奏稱銑等挾讐害之再命刑部郎中顧福

錦衣千戶謝瑛押雄往覓其獄。所逮銑奏鞠治。福等擬  
雄監守自盜。齊增減官文書。銑奏罪不安。復坐罪有差。  
刑科參看福等會勘雄等事。情罪輕重不倫。福等亦被  
逮。刑部各擬合坐者律。雄發充軍。齊革職爲民。銑調梧  
州府推官。福調永州府同知。智瑛俱調邊衛帶俸。

秋九月直隸無錫常熟二縣地震有聲。○戶部尚書楊鼎  
致仕。○冬十月遼東巡撫陳鉞請討建州夷以撫寧侯朱  
永爲總兵官。陳鉞提督軍務。汪直監督軍務。出塞捕虜。○  
論建州功。加汪直祿監督十二團營。進封朱永爲保國公。  
陞陳鉞戶部尚書。王宗彝僉都御史巡撫遼東。

初文廟以女直種類歸款。分置建女直屯。憐海等衛各

授指揮等官。所以渙其羣。俾不相統攝。以內戴中國。外禦北虜。誠以夷攻夷上策也。歷歲朝貢。間有寇邊。不爲大患。惟嚴守備。來則逐之耳。成化初。守臣以建州寡弱。貪功賞。請兵征勦。至是鎮守副都御史陳鉞又說汪立功。固寵已。亦倖進。虛張邊警。妄請出師。汪主於內。遂令撫寧侯朱永掛印總兵。鉞提督軍務。汪便宜生殺陞賞。時建州頭目六十餘人來貢。遇汪於廣寧。汪誣以窺伺。馳奏請拘囚之。旣到。給就鴻臚演禮。入門伏起。三校擒一格。聞擾攘困乃就綁。監禁在衛。虜衆不意大兵猝至。壯者逃匿。惟余老弱。或殺或捕。旋凱獻俘。汪將入城。諸大臣皆遠迓上御文華殿以俟。論功陞賞。汪加祿米三

千餘石。永進爵保國公。鉞進右都御史。未上。改司徒。郎中王宗彝以督餉陞太僕少卿。尋改僉都鎮遼。餘官旗陞者一千八十九人。賞者一千五百四人。

命徙延綏定邊營于中山坡。

初。余子俊巡撫陝西。建議安邊營平曠難守。宜退守中山坡。其後都御史丁川復以安邊營爲便。而巡按御史李敏亦言開墾

上目之。曰。退也。棄城豈守邊之

策。且封疆百里。城池三座。豈可輕棄。若曰空曠難守。則定邊花馬池何以防守。若曰運糧艱阻。則寧夏高橋見何以運餉。議與川合。至是子俊爲兵部尚書。固守前議。言臣嘗訪求古今守邊事宜。安邊及新興永濟等處水



少昔范仲淹守鄜延必據水與險永樂間棄東勝不守亦其明驗况今寔未嘗棄乎詔可

閏十月命致會定見行律條

南院右都御史王恕奏律乃治天下大法我太祖高皇帝斟酌歷代律條定爲大明律凡四百六十條頒示天下而名例律有曰凡律令該載不盡事理若斷罪而無正律比附應加應減定擬罪名近在京書坊刊行大明律後有會定見行律一百八條不知何時會定者在內法官老于刑名者必不依此比附但恐流傳四方未免有誤新進之士畧舉其兵律多支廩給條及刑律罵制使及本管長官條皆輕重失倫不可行于天下乞以

其板毀之。至是法司會議宜以恕言通行內外法官自後斷罪悉依大明律并奏准見行事例。故有再稱會定律條比擬出入人罪者。以故出入人罪論仍行書坊卽將所刻本燒毀違者並治以罪從之。

十一月滿魯都殺比加思蘭併其衆○監察御史王億陞湖廣按察司副使

時王億見戴縉以頌汪直得陞不耻效尤亦進言汪直所行不惟可爲今日法可爲萬世法也一時傳聞四方無賢愚貴賤皆唾罵之數月吏部承汪直風旨陞億湖廣副使。

十二月建州夷寇遼東

建州女直以復仇爲辭擁衆深入遼陽清河等堡殺虜男婦皆支解以殉或碓舂火蒸以洩其忿掠牛畜焚房屋不可勝數邊將皆歛入自保不敢與戰陳鉞方冒前功恐沮陞賞乃隱匿不報於是遼地騷然屯堡屏迹弗克耕耨矣

御史許進上言各布政司開科乞命翰林官主考

御史許進言國家以科目取士慎選考官近各布政司每遇開科輒徇私情所聘考官者多非其人以致校閱不精兩京俱命翰林官主考故所取得人乞各布政司亦如兩京例命翰林官主考爲是上諭禮部臣曰科目選賢國家重事若聘主司有徇私作弊者令巡按御史

并布按二司互相糾察或爾部中詳看體放得出奏來必重治之○按嘉靖戊子辛卯各布政司鄉試俱命選京官二人主考亦與許進建言之意同恐此法終不可罷

南京吏部尚書崔恭卒○禮部尚書鄒幹工部尚書王復致仕

先是戶部尚書楊鼎致仕令有司月給米二石人夫四名應用前此大臣致仕未有給米撥夫之例有之自鼎始至是幹復亦命有司給月米人夫如楊鼎例

庚子十六年春正月戶部尚書陳鉞自遼東馳驛趨部管率○二月漕魯都寇榆林○三月復命太監汪直保國公

朱永尚書王越率兵出塞襲虜于威寧破之封王越爲威寧伯

太監汪直喜事開邊聞有榆林之警遂薦王越朱永相與統兵而西未至榆林虜已出塞越曰受命討虜無俘獲何以班師遂與直等議潛師出塞至威寧海與虜戰斬首功四百而還直之出也所在都御史皆鎡甲戎裝將迎至二三百里望塵跪伏一如僕隸而揖拜之禮一切不行以是多見喜旋得進陞時有諺云都憲叩頭如擣蒜侍郎扯腿似燒葱士風至此良可哀也○汪直等奏捷勅吏戶二部二部曰汪直王越出境勦殺虜寇有功直歲加祿米四十八石越賜誥券封奉天翊衛推誠

宣力守正文臣特進光祿大夫柱國威寧伯食祿一千二百石子孫世襲御史許進等奏王越原燕都察左都御史今蒙以靖虜功勅封伯爵寵遇非常臣工胥慶乞照先年兵部尚書王驥禮部尚書楊善事例仍令本官兼職管事愈見增重奏上命燕都御史掌印提督團營如故○按王越逢迎汪直獵取爵位許進又從而附會之一時皆譏之名臣士風習尚可知矣

兵科給事中孫博疏請禁革東西二廠緝事旗校不報

孫博上言數事一宜編集前代賢君所納諫章以備御覽一令法司大臣刊布累朝奏准條例輔翼律令並行一令各布按二司及守巡官各府知府每於歲首卽開

僚屬考語冊報巡按御史以俟考覈其有偏徇不公遞  
加降黜治罪一東西二廠緝事旗校多毛舉細故以中  
傷大臣旗校本廝役之徒大臣乃股肱之任豈旗校可  
信反有過於大臣縱使所訪皆公亦非美事一或失實  
所損實多今嚴加禁革奏入上曰孫博不諳事體本當  
究治忽忽之時汪直聞博奏涉西廠事怒甚呼博面加  
詰責人皆爲博危之

夏四月雲南麗江白石雲山裂半移金沙江中水溢沒田  
苗蕩民居○六月福建長樂平地山起○薛逵罷改南京  
戶部尚書陳俊爲南京兵部尚書秦贊機務○秋七月遼  
東巡按御史強珍論劾前巡撫陳鉞詔罰俸

珍効遼東總兵侯謙前巡撫都御史陳鉞等失機隱匿等罪六科十三道亦交章糾効謂各官意在急受陞賞故將虜情隱匿直待陞賞事畢然後朦朧掩飾奏聞欺君罔上罪不容誅事下兵部尚書余子俊覆議請旨詔從輕罰俸兵科都給事中吳原等効奏遼東鎮守太監韋朗總兵官侯謙前巡撫陳鉞等啟釁冒功失機隱匿罪以祖宗法度爲不足畏生靈血肉爲不足恤不忠不仁莫此爲甚雖爲御史强珍所効不過停俸戴罪情重法輕公論未愜請重加懲治爲人臣欺罔之戒御史許進亦以爲言且謂陳鉞如宋黃潛善賈似道其罪尤甚上曰爾等所言皆是朗等本當重罪但事已處分其已之



南京十三道御史徐完等劾奏戶部尚書陳鉞巡撫遼東時爲御史強珍所劾止停俸一年而鉞罪重罰輕不誅何以示戒六科給事章玄應等亦言鉞存心陰險制行愎邪玩寇殃民冒功希賞乞明正典刑以爲人臣不忠欺罔之戒不報。

逮遼東巡按御史強珍下獄謫戍

陳鉞怨王越掌院不行阻止強珍汪直巡邊回京鉞出迎至五十里訴珍奉越風旨見劾直怒至三十里所越亦來迎遂不容見明日卽遣腹心指揮往遼東同後巡撫王宗彞審勘虜情宗彞阿直意誣珍妄奏遂械珍赴京直拉珍入內酷刑逼招受越所使珍不服下錦衣獄

會多官廷鞫無敢爲珍辯者。竟謫戍遼東。兵部尚書余子俊及科道官皆罰俸。

占城請討安南不許。

時安南累歲侵擾占城。占城遣使入奏請討之。汪直遂獻取安南之策。職方郎中陸容上言。安南臣服中國已久。今事大之禮不虧。叛逆之形未見。一旦以兵加之。恐遺禍不細。直意不止。乃傳上旨。索永樂中調兵食數甚急。時劉大夏亦在職方。故匿其籍。徐以利害告余。尚書力言沮之事。乃寔。是時汪直東構怨於女直。北挑釁於鞑靼。二方兵連禍結。已殃民辱國矣。交南之役。使直復逞其志。天下安危未可知也。幸而本兵協力阻止。豈非

祖宗之靈社稷之福斯世斯民之大幸歟

朝鮮請改貢道不許

時朝鮮貢使苦爲建州女直遮道請改貢道由鴨綠江  
中官有朝鮮人欲自爲地事下部議職方郎中劉大夏  
曰朝鮮貢自鴨綠關由遼陽經廣寧過前屯而後入山  
海迂回三四大城戍此祖宗微意若自鴨綠江抵前屯  
山海路大徑恐貽他日憂不可從遂不許

建陝西巡撫副都御史秦紘下獄尋釋之命巡撫河南

紘以進士爲南京御史劾中官降北黃驛永薦知雄縣  
又禁中官捕獵被誣禍幾不測民數千走擊登聞鼓訟  
冤得調歷陞食都御史巡撫宣府再陞副都御史巡撫

陝西時秦府旗校肆橫苦軍民紘悉擒治不少貸王不能堪許紘凌親王上怒逮紘詔獄命內臣尚亨籍其家得黃絹一疋故衣數事亨還言紘貧狀上親閱其貲嘉數良久立釋紘且賜鈔萬貫旌其廉巡撫河南曾汪直至他巡撫率屈禮紘與抗密疏直多帶旗校擾地方直還上問各省撫臣賢否直獨稱紘廉能上出紘疏示直直頓首伏罪益稱紘賢不置上乃釋直

八月立濬陞禮部侍郎仍掌國子監事○九月四川威州地震有聲○辛丑夜西方流星如大盞赤色光燭地自婁宿西北行至霹靂旁尾跡散○冬十月余子俊致仕改陳越爲兵部尚書○湖廣江西等處巡撫官以所部災傷奏

免各官明年朝覲

吏科給事中王瑞等言。比湖廣江西等處巡撫等官。各奏所部災傷民饑盜起。請免各官明年朝覲。臣等以爲朝廷命官。初意惟欲其安養生民。撫綏地方。今民饑盜起。皆各官不職所致。正當罪以示警。顧乃爲之請留。前後因仍。恐爲定制。諸司正官。旣畱則進退人才無由而審止。憑巡按等官所報揭帖。則考察之典亦應故事而已。且地方多事。自宜設法拯濟。何至故違舊則。使朝覲大典漸至廢弛。明年來朝。并在任官。乞嚴加考察。或有不公者。聽科道糾之。庶足以爲徇情欺罔之戒。上曰。三年述職。國家舊典。若徇所司。各庇其屬。有貪暴荒怠者。

烏得而覈之。給事中言是其令吏部知之。

遣戶部員外郎官廉勘覈東官莊田。

時景州獻縣阜城民田萬頃界接東官莊管莊內侍欲冒占。且子粒十倍公家。民甚冤之。訴于朝。乃遣廉偕御史錦衣官往勘。內侍哀遣人要廉曰。田如歸我。講讀官可得也。廉曰。以萬人之命。易一官。吾弗爲也。至其地。徧集居民。指陳故迹。卒以所占田盡歸於民。援例起科。畝率三升。同事者懼有所忤。廉曰。我戶部也有害吾獨當。諸公何憂。既命下。皆從所擬。

辛丑十七年春二月調國子監丞祝瀾爲雲南廣西府經

歷

濶上言請令天下府州縣學文廟皆如南京國子監制爲木主上謂文廟制體已定何復紊亂舊章禮部看詳以聞侍郎周洪謨劾濶輕率妄議命調外任

陞鎮守湖廣都指揮同知王信爲都督同知總督漕運信以都指揮同知鎮臨清兼管倉糧決獄明慎請託不爲鎮湖廣條陳八事曰繕城隍廣儲蓄省徭役立賞罰選能官禁窩戶練將才慎守備又條上慎專任以利民情是倉儲以備兵荒修兵衛以圖無患禁科罰以省財用又疏言湖廣蠻夷雖腹中之憂實無能爲但我軍姦黠之徒利其竊發可以邀功今但選精銳常加隄防勿蹈前非其患自息荆襄流通本意逃避徭役長子老

孫已成家業。濫加誅殺。非惟死及無辜。抑恐致傷和氣。  
南畝之農。無所蓄積。歛獲未竟。餼糧已空。機杼纔停。布  
縷何在。求免饑寒。不可得也。乞遜公正仁惠守令。大加  
存恤。濫陞官員。無慮千百。無一矢之勞。冒崇階之賞。乞  
查勘削奪。三司方面。所以折衝禦侮。承宣激揚者也。當  
公以格物。蕪以律已。至乃端本澄源。則在朝廷而已。所  
部指揮劉斌。張全。智勇過人。力薦於朝。且云英俊之士。  
處心剛正。寧肯抑心低首。奔走媚求。若不曲加攬訪。則  
賢才多隱。志士沉匿。任用何能廣乎。永順保靖二夷。世  
相爲仇。信諭以威福。尋亦解不爲亂。靖州武岡諸蠻。久  
不靖。守臣議勦之。信巡邊。面諭犒以牛酒。且詰其順逆。



讀皆稽顙曰累歲苦揮使徵索故作亂今將軍待我如此我輩願爲屬役尚敢耶因請爲信舉肩輦以示敬陞都督同知總理漕運卽日上道嘗語人曰荷國厚恩未能報稱此行當以洗滌肺肝少盡區區耳信沉毅簡重被服儒素出入省騎從人莫敢犯歷鎮大邦不營私產平居默坐展玩經史寬袍緩帶糲飯蔬羹故人婚喪傾心賑恤無所顧吝出鎮三十年筭無華衣廐無肥馬鈴閣之下寂無人聲金玉奇玩亦無所好子繼善從善皆舉進士有名

南京及江北四府山東河南府州縣同日地震有聲禮部以二月初十日南京及江北四府山東河南等府

州縣俱同日地震有聲奏言考之傳記地動千里有大  
災又云春動者歲凶二月動者水災今所動不止千里  
又况鳳陽南京皆祖宗根本之地宗廟社稷所在關係  
尤重乞行各處守臣理冤抑恤孤寡以消變異儲廣蓄  
省費用以備歲凶濟河渠築河隄以防水患毋徒事虛  
文從之

陞周洪謨禮部尚書徐溥禮部右侍郎○三月賜進士王  
華等三百人及第出身有差○夏四月勅司禮太監懷恩  
同三法司審錄囚徒○六月陞湖廣左布政使何喬新爲  
右副都御史巡撫山西兼督三關兵事

巡撫何喬新奏緣邊軍民往往潛出境外伐木捕獸猝

遇虜寇拘執其人冀得免死遂用爲嚮導侵犯邊境談  
有桀黠不逞者如匈奴之於衛律趙元昊之於張元昊  
是其爲邊患可勝言哉是宜嚴立禁防凡守把關隘之  
人知情故縱俱謫發烟瘴地方充軍有能捕獲首給賞  
犯人財產庶奸頑知警邊防戒嚴奏上從之

西胡進獅子遣中官迎入

成化辛丑歲西胡撒馬兒罕進二獅子至嘉峪關奏乞  
遣大臣迎接沿途撥軍護送事下兵部謂進貢禮部事  
兵部不過行文撥軍護送而已禮部覆奏大畧言獅子  
固是奇獸然在宗廟不可以爲犧牲在乘輿不可以備  
駟服蓋無用之物不宜受且引珍禽奇獸不育中國不

貴異物賤用物等語爲律力言當却之如或閔其重譯而來嘉其奉藩之謹則當聽其自至斯蓋進貢之禮若遣大臣迎接是求之也古者天王求車求金各諸侯春秋譏之况以中國萬乘之主而求異物於外夷寧不貽笑於天下後世事遂寢而遣中官迎至則其狀只如黃狗但頭大尾長各有髯耳。

南京科道陳金周紘等以地震論劾侍郎劉俊祭酒王慎等似畱治事

南京十三道御史陳金等言南京地震有聲白毛頰長猛虎近城傷人且當春陽和煦之時而寒風淒雨有類秋冬臣惟根本重地災異獨甚皆大臣不職所致劾南

京工部侍郎劉俊兵部侍郎馬顯禮部侍郎李本國子祭酒王與皆有干清議乞罷歸田里南京六科給事中周紘等亦以爲言且及左副都御史胡拱辰鴻臚卿李榕章下吏部覆奏俱畱治事

秋八月虜馬亦思因寇大同命太監汪直監督軍務威寧伯王越佩征西前將軍印鎮守大同防禦虜寇○真定縣學教諭俞正已上言曆法下錦衣獄

真定縣學教諭俞正已上言曆象授時乃敬天勤民之急務後世歷法失差由不得古人隨時損益之常法也我朝盡革前代弊政獨於曆法可議臣竊以經傳所載日月行天之常度本曆元以步筭又以陰陽晦盈之理

求之以驗今曆謹詳定成化十四年戊戌十一月初一日巳丑子正初刻合朔冬至日月與天同會於斗宿七度至三十三年丁巳十月初一日戊辰酉正初刻合朔冬至日月與天復同會于斗宿七度所謂氣朔分齊是爲一章者也今將一章十有九年七閏之數冬至月朔閏月節氣年月日時逐月開坐編成一冊上進請勅該部精加考訂仍行欽天監從宜造曆頒布天下詔以曆法已嘗稽定今奏有差所司其看詳以聞禮部尚書周洪謨等會掌欽天監事太常卿童軒集曆科官生與正已參考講論竟日不能決洪謨等因奏正已止據邵子皇極經世書及歷代天文志推算氣朔又祖述前代術

家評論歲差之意言古今曆法俱各有差曾不知與天合雖差而可今正已膠泥所聞輕率妄議請下法司治罪詔以正已不諳事體妄議曆數錦衣衛其執治之○按俞正已上言曆法縱未必是亦當存之以備參考周洪謨乃必請法司治罪錦衣執之此休休有容古之所謂一个臣果如是耶

九月兵部請嚴安南之備

兵部奏安南國僻在西南萬里之外與雲南兩廣接壤永樂間王師克伐郡縣其地其後守臣失馭乃復陷沒今又轉肆憑陵東吞占城西併老撾殘破八百僞勅車里宣慰司殺滿刺加使臣先年有邊人還自安南稱其

欲犯雲南以其母諫而止都御史王恕亦稱安南遣人僞爲商人來覘虛實又聞有江西人王姓者亡命爲僞御史爲之畫策督兵累次侵擾未必非此人之謀占戎使臣亦言安南治戰船三千欲襲海南不可不爲之備上曰朕視安南禮絕外國每優容之而彼外示恭謹中懷桀黠迹其所爲蓋有不可掩者兵法曰母恃其不來恃吾有以備之宜申命雲南兩廣守臣嚴越境亡命之禁彼若有犯當整兵問之

冬十月召余子俊爲戶部尚書○總督漕運都御史張璠請以宋儒胡瑗從祀下禮部議

總督漕運都御史張璠言宋儒胡瑗揚州如臯縣人與



孫明復石守道讀書泰山明體用之學教授蘇湖當時  
取其學規行于太學所著有資聖集景祐樂議口義中  
庸解春秋口義言行錄皆有益後學仰惟聖朝崇重儒  
術凡前代諸有功斯道者悉已列之從祀或專建同事  
下禮部知之

申嚴遼東馬市禁例

嚴遼東馬市之禁先是陳鉞巡撫遼東奏開馬市於開  
原廣寧二處朵顏諸夷每月兩市後通事劉海姚安稍  
侵牟之諸夷懷怨寇廣寧不復來市至是鉞爲兵部尚  
書懼罪及已乃奏言初立馬市非資外夷馬以爲中國  
之用蓋以結朵顏之心撤海西之黨今宜申嚴禁例每

爲市令叅將一員布按司官一員監之有侵尅者重罪之廢毋激變之患詔可仍令巡按御史治劉海姚安之罪以聞

壬寅十八年春正月劉吉憂去尋起復

吉丁父憂詔起復視事吉上疏辭而托外戚萬喜言于上固陋之侍講陳音與書勸其力辭吉不答

虜馬亦思因寇大同命戶部尚書余子俊總制軍務帥師禦之

虜寇大同報威寧海子之怨也邊將與戰失利命戶部尚書余子俊總制諸軍事出京營兵禦之子俊分兵戍守要害虜遂引去師還加太子太保

山西巡撫副都御史何喬新奏破虜于灰溝召爲刑部左侍郎○三月改王恕爲兵部尚書兼副都御史巡撫江南總督糧儲

時應天鎮江常州太平寧國池州徽州安慶廣德等處災傷恕上疏曰臣自奉命巡撫節該撫屬府州申奉各部勘合派買各項物料及織造紵絲紗羅等項數多該用價銀動以萬計在官錢糧刮剝殆盡見年里甲出辦不起因而逃移民情實有不堪臣又見各處進貢禽鳥花木等物經過去處亦甚騷擾臣惟凡此之類朝廷之上固有不可缺者亦有可減省者亦有所可缺者且如糧餉軍需紵絲之類將以養軍馬備宿衛給賞四夷使

臣不可缺者也。綵裝奇巧花樣紵絲紗羅十餘人碌亂  
半年以上方纔得一件。所費物料難以數計。賞賜臣下  
以酬其勞。使之感恩思報。固無不可。但賞之有節。得之  
者必以爲奇。又且省費。賞之太濫。得之者不以爲罕。且  
又傷財。古之明主。一頻一笑。猶且愛惜。敝袴猶且藏之。  
以待有功。况此物乎。此可減省者也。至於禽鳥花木等  
數年間進之者。不知其數。一經重瞳之後。料必置之他  
所。臣仰惟陛下聰明聖知。德配天地。宵衣旰食。憂勞黎  
元。必不以此爲意。然嘗有罷進貢之旨矣。而進貢者未  
見斥去。是以不知陛下之意。競尋奇異之物。不遠千里  
進至闕庭。以爲孝順。殊不知此物非勞民傷財。則不可

得得之無益於時無補於治此可缺者也夫物或可缺而民則不可缺書曰后非衆國與守邦是知民者豈可缺乎惟其不可缺是以古之聖帝明王愛民如子撫摩安輯務俾得其所彼投珠抵璧却千里馬焚雉頭裘者非不知珠王之可貴而千里馬雉頭裘之可愛也但恐留意於此因而妨廢政事失天下心所以投之抵之却之焚之者蓋欲固結人心而爲社稷計也且不作無益害有益功乃成不貴異物賤用物民乃足此經籍之格言也陛下誠能深思而力行之若功不成而民不足則斯言不足信而聖人之道不足重矣今當連年災傷之餘軍民凋弊之際非特織造可以減省進貢可以寬恤

凡百冗費俱宜樽節。一應不急之務。俱宜  
勅該部照例行移。巡按監察御史覆勘。前項  
除豁夏稅。仍望陛下。崇尚恭儉。今後上用。并官中所用。  
及賞賜諸王龍鳳等項花樣衣服。合無只着兩京內織  
染局織造。其合用預備賞賜等項紵絲。合無照依原價  
行移各該司府織染局織造。差去官員匠師人等。合無  
取回。禽鳥花木等項玩好之物。合無不必進貢。俾軍民  
息肩。感戴聖德。實爲社稷之福。臣叨爲具臣。愚不知止  
因言災傷而冒昧及此。罪該萬死。惟聖明裁之。宥其罪  
而賜之歸田。幸甚。○時又遣太監王敬往南直隸浙江  
江西等處爲害。恕又上疏曰。臣始以爲朝廷軫念淮揚

蘇松等府地方饑荒。軍民流亡。恐臣等奉命不謹。莫能區畫賑貸。以致失所。特遣近臣齎內帑。物遠來救濟。既喜且懼者累日。已而傳聞太監帶百十號馬快船隻裝載私鹽。前來江南收買玩好之物。雖未委虛的。第今大江南北饑荒殊甚。斗米值七八十錢。民有饑色。野有餓殍。老稚轉於溝壑。壯者散而之四方者。不可勝數。臣奉勅往來提督賑濟。近來雖頗安妥。而張口待哺者尚多。若太監此行。爲賑恤饑荒而來。則大江南北億萬生靈舉蒙再造之恩。陛下聖德大業。可以比隆二帝三皇。而無疆國祚。可以與天地相爲悠久矣。若爲收買玩好之物而來。似此聲勢張皇。未免騷擾郡邑。驚嚇吏民。臣

恐遠近傳聞將謂陛下惟珍奇是好而無憂民之心致使狂夫得以藉口非社稷之福也臣以爲當此饑荒之際朝廷正裁冗費却貢獻禁奢侈抑僥倖慎爵賞重名器輕徭役惜民力以收天下之心以培植萬年社稷之基本夫何織造旁午貢獻絡繹奔後之風競起倖進之門大開遂使爵賞冗濫名器混淆徭役繁興財力日屈欲斯民之不貧且盜欲天下如泰山之安得乎昔唐太宗遣使往涼州諷李大亮獻其名鷹而大亮不可明皇今益州織半臂褙子琵琶捍撥鏤牙合子等蘇許公不奉詔其事載諸信史後之讀史者莫不稱太宗明皇之明李大亮蘇許公之忠今陛下以上聖之資居至尊之



位聰明睿知。本乎天性。仁孝誠敬。不待勉強。可以爲堯舜。可以邁湯武。尚何太宗明皇之足言哉。臣幸際明時。備員巡撫。偶遇所聞。若隱忍不言。使陛下不知。而天下國家受其弊。豈忠臣乎。非惟有愧於臯夔稷契伊傅周召。豈不有愧於李大亮蘇許公之輩。是以臣不避斧鉞。爲陛下言之者。非爲身家計也。爲社稷計耳。惟陛下留神深思。速返其使。併將前數事。與臺閣大臣。從長計議。作急區處。以安天下。社稷幸甚。生民幸甚。○時又令司設太監杜福友傳上旨。着國子監生湯榮軍舍孫智前去常州府。着落府縣拘集民人段銓家小。取要截江網古書一部。廬岐僧院要取刻絲作羅漢十八幅觀音。

二幅再有古跡書畫尋來進用恕又上疏曰帝王之學  
與韋布不同韋布之人隱而未用多聞強記將以待聘  
故其學貴乎博帝王者身兼治教之責而爲億兆之主  
故其學不在乎博在乎知其要夫經各有其要能知其  
要則足以盡博矣詩三百一言以蔽之曰思無邪若能  
思無邪雖不讀詩亦可也經禮三百曲禮三千亦惟曰  
毋不敬而已若能毋不敬雖不讀禮亦可也佛氏之書  
臣不知其幾千萬卷也其要不過慈悲而已老氏之書  
臣不知其有幾也其要不過清淨而已曰慈悲曰清淨  
自是出家人之事皆非治天下之道也其餘神仙之說  
黃老之術盡妄誕耳非惟治天下不可用且以惑世誣

民而爲斯道之害尤非帝王所當留意者也儒者之書  
修明三綱五常之道修齊治平之理如布帛粟穀之在  
天地間有不可一日而無也然而諸儒論說紛紛簡編  
浩繁亦豈帝王所能遍觀而盡讀之今陛下勵精圖治  
自朝至於日中旻不遑暇食若復博覽羣集玩索章句  
不無有勞宸衷非所以保養天和也如於退朝之後清  
燕之時取書之二典三謨與夫太甲說命無逸旅獒諸  
篇而讀之復取漢唐書有關於治亂成敗者三二策而  
涉獵之儘可以開廣聖心資助化理何必徧求諸家之  
書而觀之乎大抵帝王之學非徒誦說文字講解訓詁  
而已要在學二帝三王之道身體而力行之建中建極

爲百官之程式俾萬世之乂安可也。且土階三尺茅茨  
不剪堯也。惡衣菲食禹也。今日崇高富貴固難師法乎。  
堯禹亦不可不以堯禹之心爲心而樽節之。若能以堯  
禹之心爲心而樽節之。卽今日之堯禹也不過聲色不  
殖貨利湯也。視民如傷望道而未之見文王也不泄邇  
不忘遠武王也。若能心湯之心行湯之道卽湯也。心文  
武之心行文武之道卽文武也。夫何不可及之有。凡此  
皆聖學之急務也。孟子曰左右皆曰賢未可也。諸大夫  
皆曰賢未可也。國人皆曰賢然後察之見賢焉然後用  
之。左右皆曰不可勿聽。諸大夫皆曰不可勿聽。國人皆  
曰不可然後察之見不可焉然後去之。今日進退人才

必如此而後可不如此則君子退而小人進矣又曰左右皆曰可殺勿聽諸大夫皆曰可殺勿聽國人皆曰可殺然後察之見可殺焉然後殺之故曰國人殺之也今日之用刑亦必如此而後可不如此則刑必及於無辜矣諸葛武侯曰宮中府中俱爲一體陟罰臧否不宜異同若有作奸犯科及爲忠善者宜付有司論其刑賞以昭平明之治不宜偏私內外異法也今日之刑賞又豈可不如此不如此則同功異賞同罪異罰而人心不服矣凡此皆馭世之要道也是道也人皆知之皆能言之然人皆知之皆能言之而不言者恐無益於事徒自失寵而取辱也臣雖至愚極陋非不知此第以菲才充位

六卿受恩深重若復如此非惟有負恩德且非疇昔之志也是以直言而不隱者非沽名也將以報德也報之欲陛下爲堯舜之君也欲陛下左右之人爲堯舜之臣也欲天下蒼生爲堯舜之民而被堯舜之澤也欲後世之人思慕堯舜下知今日之人思慕堯舜也倘蒙不以臣言爲迂留神深恩專意於二帝三王之學是法是行而不爲異端異術之所惑其進退人才也其用刑也必如孟子之言其賞功也其罰罪也必如武侯之言若雍熙泰和之治不見效於今日聖德仁聲不傳播於無窮臣則其受妄言之罪

妖人王臣伏誅

妖人王臣自幼爲南京公侯府家人數易主易必易名  
惟以妖幻惑取人財所得輒盡累爲主人惡刑所加兩  
足皆不能良行成化初術術於江陰諸大家皆不納獨  
周惟瞻稍待之見其一匣中有二木人長尺餘能自相  
抵觸坐作進退聽其指揮凡人之物經其目者必能暗  
取後往北京遷舉授得見上歲辛丑上命中官王敬往  
湖湘江右浙江京東諸郡王臣同行從以無賴二十餘  
徒專一攫取財物所歷三司郡縣官受其辱民受其擾  
江陰諸大家以舊憾最受其毒巡撫王恕復上疏曰臣  
見內官監太監王敬弄勢張聲騷擾軍民恐爲國生事  
是以昧死上聞乞取本官回京以消未然之患不知緣

何不回臣見應付王敬開文內開准與長蘆運司餘鹽  
七十引仰惟聖意蓋欲將鹽兩平賣價收買藥餌書籍  
免致科擾下人此陛下仁民愛物慮患防微之盛心也  
豈期跟隨王敬千戶等官王臣等撥置王敬自離京師  
直抵南京經過軍衛有司運司驛遞巡司等衙門無不  
科擾所得不可勝計比到南京清江廠住泊數日上新  
河又住泊數日凡城裡城外得過之家所有玩器書畫  
金銀寶石等物搜括殆盡王臣又撥本官將原賜官塩  
夾帶私塩強發與太平寧國池州安慶九江五府建陽  
安慶九江三衛并廣德州共塩一萬五千五百引逼取  
價銀三萬二千五百五十兩塩斤殊多不足價銀反要



加耗又有私鹽數十船發與江北廬州等府衛及江西  
南昌等府不知又逼取銀幾千萬兩宣州衛不肯領鹽  
却將指揮責打亦嚇去銀二百八十兩又發鈔四十塊  
與池州府逼銀二百二十兩又發鈔五百塊與杭州府  
一百一十塊與嘉興府俵散糧長每塊要銀五兩杭州  
得二千五百兩嘉興得五百五十兩其在二府無物不  
取城市鋪店爲之關閉村落人民無不駭散又今蘇州  
府縣遍逮大戶索要玩器并金銀等物大戶有者出獻  
無者買獻又威逼蘇州長吳二縣着織絲粧五毒大紅  
紗五百一十二疋每疋該工價銀一十五兩止給與銀  
一六兩五錢機戶陪銀四千三百餘兩及其交納反要机

戶每疋解扛銀五兩機戶破家蕩產若不可言且五毒者艾虎蜈蚣蝦蟇蛇蝎也以五彩絨組織此五物於大紅紗兩肩胸背通袖膝襴之上其爲淫巧奇怪古所未聞此物只用於端午之一日其他日皆不用又況此毒物人皆見之必以爲不祥而憎惡之今織之千衣非至貴所宜服亦非官中所可服不知王敬暴殄許多天物害害無數赤民織許多件數將何爲也及到無錫縣王敬親率王臣等下鄉打開大戶鄒賢家門捉索全銀鄒賢躲避就在其家住坐二日拘令常州府官帶領畫匠將本家房屋畫成圖本聲言回京進與朝廷定將他家抄了嚇得鄒賢兄弟二人銀五千餘兩與王臣等分用

其餘捉拿華文熙等鎖打勒銀難以數計又嗔知縣熊經拘人不到要行細打本官懼怕姑將官庫銀兩替各未到大戶應出又取武進胡溥等江陰蔣鎮等每名要銀皆千七八百兩又稱朝廷有密旨着我去徐中書等家討要玩器書畫等物被常州知府孫仁勸畱免去只今各家湊銀萬兩送王敬等分收遂有無籍小人乘機妄首人家有物王敬等輒便差人四散捕捉驚嚇人戶逃竄轉與四隣追要至趕隣婦陸氏等下河身歿地方爲之騷然王臣欺瞞王敬私詐軍民銀兩又不可以筆記其松江等府不係坐來收買藥餌書籍地方亦皆毒擾徧盡人民委寔受苦不得安生臣惟陛下自嗣大歷

服以來敬愼厥德賢能效職庶政咸和一十年間邊方  
少警海內晏然不圖今日而有此事非獨上靡國體抑  
且下失人心設使王敬等將所得玩器金銀等物盡數  
進獻以充國用而取之不義如此得之不以其道如此  
非聖明所宜受况朝廷富有四海府庫皆財倉廩皆粟  
豈少此哉如或不肯盡數進獻使朝廷虛擔其名各人  
實享其利豈不尤大可太息兼且朝廷所用錢糧多仰  
給於蘇松常等府若使彼處百姓不得安生國用何所  
取給此數府百姓尤宜加意安全而不可使之困苦流  
竄也昔治書侍御史權萬紀言宣饒出銀大發采之歲  
可得數百萬唐太宗曰卿未嘗進一賢才而專言銀利

昔堯舜抵璧於山投珠於谷漢之桓靈乃聚錢爲私藏卿欲以桓靈視我耶乃出萬紀今王敬等所爲害理尤甚決不可以待萬紀者待之臣又訪得王臣卽王瘤子俱是奸詐無賴小人素無勲勞止以左道邪術得幸父子俱得好官非惟虛糜廩祿有玷名器且使懷才抱藝之士爲之不忿夫金銀乃天地之精氣非智術所能爲設若王臣能之何不自倣自用何以日前到處以此爲名騙人財物累犯刑憲何以今日撥置內官用强要人金銀騷擾地方昔文成五利旣以邪術欺漢武今王臣復以邪術欺陛下此忠臣義士所以爲之痛心而扼腕也且陛下爲萬乘之君百神之生而敢爲之欺罔如此

百姓乃陛下之赤子邦家之根本而敢肆其暴虐如此是可忍也孰不可忍也臣又聞王臣在江西等處收買美色婦人數人盛粧在船言頗矯誣人多不信百戶姚敬娶娼爲妾被王敬搜出送蘇州衛鎮撫按監於本官名下追銀一千兩恐後訐出王臣前情仍將本婦給還姚敬此亦人所共知凡有識者莫不曰陛下聖德寬仁敬天愛民若知此情必不容之但一時不知耳臣備員六卿奉勅巡撫職在衛國而安民覩茲弊事若循默不言依阿取容萬一事出不測以遺君父之憂雖死何贖是以不敢不言之伏望陛下畱意於難保之天命割恩於壞事之小人奮乾剛之獨斷昭王法之無私行取王

敬王臣等到京明正典刑使天下知聚斂之擾人非朝廷本意乃王敬等矯制王敬擾亂地方非其獨爲乃王臣等撥置而然也如此則怨有所歸人心寧止而天下安矣不然則怨無所歸其患蓋有不可勝言者矣臣愚仍望朝廷自今伊始凡百用度悉從儉約節不經之費罷無功之賞裁冗官汰冗食則財用自足果缺公用物件定擬數目行移出產地方採辦進用則民自不擾內外公差官員跟隨頭目多不許過三二名則事自減省否則賣官鬻獄不足以供執事者之費剝膚推髓不足以滿隨行人之欲欲斯民之不窮財力之不屈盜賊之不起天下之治安得乎臣爲國家之心激切不自知其

言之狂且瞽也罪該萬死倘蒙聖恩優容不加譴責伏乞將臣放歸田里耕以待盡爲幸無遑上乃詔差官校逮王敬充淨軍王臣下錦衣獄三日斬諸市

### 復罷西廠

時汪直在大同科道始交章奏西廠苛察紛擾大傷國體雖內閣萬安亦謂宜罷上乃復罷西廠中外欣然夏四月許琉球陪臣子蔡賓等南監讀書

琉球國中山王尚真奏乞以陪臣子蔡賓等五人於南京國子監讀書禮部按舊例以聞上曰遠夷嚮慕文教朕甚嘉之先朝已有舊制其今蔡賓等南監肄業有司歲給服餼俾知中國禮義永遵王化



命晉王戒飭儀賓劉欽

賜晉王書該府永和王儀賓劉欽奏要將已故東勝縣主收貯折色鈔貫及未支祿米四百石并自己祿米二百石俱辭入官以爲軍國救荒之助違例奏擾掠美沽名其失有三王卽拘欽到府責以前失今其安分守已自有樂地何必爲此矯激虛語顯書以達王其防範之五月己巳朔日有食之○故刑部侍郎林鶚子林得乞送國子監讀書不許

五月故刑部右侍郎林鶚子得乞爲國子監生上不允仍諭禮部曰蔭叙大臣子孫所以崇德報功示激勸也其間或有容身保位無益於時者恩典何可泛及今後

在京三品以上官。果政績顯著者。蔭一子。亦必能通經書大義。乃許入監。毋容一槩濫擢。

秋七月。命雲南布政司歲祭故翰林學士王禕。

洪武中。祿節雲南。

○八月。命僉都御史王濬撫治鄖襄。○閏八月。命兵部空治南京。畱守前衛百戶高洪等。

百戶高洪等已用管事。復謀管屯。上曰。國家倣古屯田之法。用戍卒耕守。蓋寓兵於農之意也。地有定業。官有定員。行之既久。其法漸廢。戍卒多役於私家。子粒不歸於公廩。管屯者有積蓄之利。而無差操之苦。所以啟後來者之謀也。洪等宜加究治。自後兵部凡官軍有濫設者。悉退出差操。

刑部尚書林聰卒

聰福建寧德人少舉進士授刑科給事改太子司直歷  
官刑書卒謚莊敏景泰中論諫之臣以聰為稱首後與  
汪直鞫遼東守臣獄益多偏徇君子有遺議云○按崔  
銑曰銑聞之張元禎曰初景帝將廢儲而立其子今百  
官各署狀惟給事中東安李侃執筆大慟給事中閻林  
聰退而語人曰惟吾抗議景帝聞之改聰為太子司直  
郎聰欣然自負今諸家文集謂聰為忠益聰後尊顯諛  
言相傳爾元禎又曰使李侃推慟心於狀豈不毅然大  
丈夫哉是時諫者三人鍾同歿于獄章綸廖莊晚雖貴  
咸黷貨敗節也景帝易儲時薛瑄以大理丞治餉于滇

署狀無瑄名。謝理乃譏瑄非也。然本朝士節不厲。少遭變事。鮮不諂附者。

九月庚戌。金星晝見。○遣少監孫端戒諭晉王。

遣少監孫端齋勅戒諭晉王。茲巡撫等官奏慶成王府奇澗抗拒父命。打灰平人姦占樂婦。王卽拘慶成并奇澗到府。令其望闕跪伏。數慶成不能教子。不啟不奏之過。數奇澗以前項罪惡。降奇澗爲庶人。

冬十一月。賜顏氏廟戶。

初顏氏裔孫博士鉉。以乏人洒掃。援孟氏例奏請。上曰。國朝祀典。二廟並隆。其令有司如孟氏數給與之。

汪直有罪。罷奪王越威寧伯編管安陸錦衣衛指揮吳綬。

謫戍極邊兵部尚書陳鉞右都御史戴縉並除名

時汪直久用事勢傾中外阿附者立路頭榮忤之者卽遭禍譴天下凜凜有中官阿丑者善諛諧每於上前作院本頗有東方朔謫諫之風一日丑作醉人酗酒一人佯曰某官至醜罵如故又曰駕至醜亦如故又曰汪太監來矣醉者驚迫帖然傍一人曰天子駕至不懼而懼汪太監何也曰吾知有汪太監不知有天子自是直寵漸衰時王越陳鉞媚直結爲死黨丑復作直持雙斧趨蹌而行或問故答曰吾將兵惟仗此兩鉞耳問鉞何名曰王越陳鉞也上微哂焉至是御史徐鑄等劾直欺罔弄權先與王越吳綬戴縉等結爲心腹大肆羅織中外

寒心天下之人但知有西廠而不知有朝廷但知畏汪  
直而不知畏陛下。續又聽信陳鉞誣執建州進貢夷人  
請兵征勦妄報功次傾竭錢糧侵盜府庫未及班師夷  
人遂卽報仇軍民被其屠害陳鉞等冒陞者數百人獨  
有王越不得預此乃爲別圖密謀汪直偕往大同肆鼠  
竊徇偷之謀爲要寵陞官之計暗地發兵連夜出境到  
於威寧海子達賊家口休息去處殺擄老幼男女虛張  
聲勢妄報大功冒濫陞賞不顧啟釁致使北狄積憤招  
結醜類大入擾我邊陲聲言報復威寧海子之怨軍民  
橫罹鋒刃糧草在處缺乏致勞九重宵旰之憂而汪直  
等若罔聞知其罪尚可容耶伏乞將直等明正典刑籍

沒家產以爲姦臣結黨欺罔弄權擅開邊釁之戒上納其言卽命三法司會多官叅擬覆奏遂直并其黨竄斥皆盡中外莫不快之○陳鉞之與汪直征建州也侵盜庫銀數十萬私匿俘虜子女多人父子各占一姝旣罷職居家寡嫂孤姪苦其凌轢潛赴京訴其事東廠刺事太監卽日以聞遣錦衣官校馳往逮之執其幼子拷掠具服所侵庫中王蝴蝶諸異品占所俘之姝俱追解赴京下錦衣鎮撫司鞫問人皆爲之危鉞乃洋洋然對于官曰金銀寔有之俱當時分送某幾千某若干子女亦有之但送某幾人某幾人同時同事某收幾人某收幾人而我所收皆衆所遺棄者以故大臣曾有所受者聞

之皆膽顫心寒相與極力營解遂得無事仍放爲民○  
初汪直出使有司迎候不及動遭筆撻有定州知州裴  
泰者預饌具以待僕從皆醉飽直心悅之至是被調道  
經曲陽縣有司皆避之直困臥公館孤燭熒然適泰至  
曲陽迎謁上司直喜甚求食且曰吾非復前比矣吾南  
行上意猶未可測明發但得夫馬起程足矣人謂小人  
得喪之態可爲世戒云

十二月進萬安太子太傅華蓋殿大學士劉珏太子太保  
謹身殿大學士劉吉太子太保武英殿大學士  
申明犯罪充軍不勾丁補役之例

御史姜昂言天下官民犯罪充軍宣德十年詔令止終



本身今有司遇凡逃亡事故率多勾丁補役殊失罰弗及嗣之義并違舊制章下兵部言比因陝西巡撫阮勤上言已嘗如例禁止今宜再加申明通行天下從之

江左陸翬之全校